



US-i amaktsü tetsübo nung Iran lenir Ali Khamenei miima ayur

Australian Open: Sabalenka, Alcaraz & Gauff quarterfinals-i iogo



Governor Bhalla-i yimtsüngtem renloktsü; lanur & tetsür tashi itdaksütsü nenshir

Dimapur, January 25, 2026 (TYO): Nagaland Governor Ajay Kumar Bhalla-i Republic Day jakdang osang lemsatepdang sorkari yimdaklir nem skills, market access aser modern infrastructure agütsütsü tongti süa bilema inyakba shiogo.

Bhalla-isa yimtsüngtem melenshütsü aser libaliro jenjang tajungba akümtsü asoshi rural development nüngdaker ta ashi.

Republic Day ya tesüiba indang benjung ka dang masü saka linük tamendakdak akangshiba sentong ka lir ta pai ashi.

Taküm benjungmung ajanga national themes ana sangoktsür, kaji Vande Mataram mejemer küm 150 buba ajungba aser kaji Atmanirbhar Bharat lir ta Bhalla-isa ashi.

"Nagaland nung biodiversity takar aser alima tobur tajung moaja lir, anungji people-centric aser environment-friendly development ajanga alima wazüka ayuba nung tongtipang shilem agitettsü" ta paisa ashi.

Tanü digital connectivity ulushiba ajanga lanurtem, teka mapa inyaktertem, aluyimertem aser entrepreneurs asoshi maongka aika lapoktsür. Iba

ajanga parnoki national aser global markets den sendakteper ta Bhalla-isa ashi.


"Nagaland nung tetsürtemi mapang talangka sobaliba, rongsenketzüng aser lokti putepa alitsüba maparen ketdangsüa inyaka arur. Tetsürtem asoshi education tashi itdaksüra, skill development agütsüra aser maongka agütsüra iba ajanga linük ajunga tashi itshitsü" ta paisa ashi.

Nagaland nung lanurtem sempet anepaluba anitetsüla aser parnok sempet amshitetsüsa sabangtem agütsütsüla ta Governor-isa ashi.

Nagaland nung inyaksangshi khenyongi balaka, sobaliba ozüngtem lir aser sobaliba senmang takar lir. Item ya India indang constitutional framework den sendakteper aser iba ajanga federal democracy tashi itdaksür, ta pai ashi.

"Republic Day ya benjung ka dang masü saka putepa külemi inyaktsü, temeyoktep akhümtsübuttsü, nendaka linük tenzüksü aser pei taginüba madak telok taginüba mezüng südaktsütsü tangatetbatem anguba mapang ka südaktsüdi" ta Governor Bhalla-isa ayongzüük.

Guru Sangyusang Pongener nem Padma Shri Award 2026 agütsür



Arishi küm 81 tain Guru Sangyusang Pongener ya March 23, 1945 nü aso aser pa ya Ao folk artist aser composer ka lir.

Guru Sangyusang ya Government Middle School Ungma, Government School Mokokchung (tang Mayangnokcha GHSS) aser Gauhati University nung azüng.

Pai lanur meyrjang aika anitetogo aser Ao-Naga sobaliba inyaksangshi mesamadaktsüi wazüka arur.

1982 nung Naga Wadir Club tentetdang pa dena liasü aser tang tashi pai tongti tezüluba mapa inyaker. Iba club ya Nagaland Home Department kübok register süa aliba cultural organization ka lir.

Tesüiba nung pai Sangeet Natak Akademi National Award (2002), Governor's Award (2017) aser Music Task Force (2018) nungi Achievement Certificate nguogo.

2014 küm NEZCC-i IGNOU den külemi Sangyusang Pongener nem Guru naroküm agüja liasü.

June 2024 nungi pai Government of India-i tenzüka Kala-Deeksha programme kübok lanur artist tem sayua arudar.

Nagaland nung 16 buba National Voters' Day amung



Kohima, January 25, 2025 (TYO): Nagaland-i Deobarnü linük den külemi 16th National Voters' Day mungogo aser ketdangsürtemi sensotem dang electoral maparen nung shilem agitsü aser democracy tangatetba alitsü ayongzüüko.

"1950 küm Election Commission of India (ECI) tentetba bilemteta kümshia January 25 nü National Voters' Day amunger. Constitution of India mapa tenzüksü anogo ka jelia ECI tentet" ta Principal Secretary, Home Department, Abhijit Sinha-i ashi.

2011 nungi iba anogo ya linük ajungalen amungtsü tenzüük aser iba anogomung ajanga sensotem dang democratic tangatetba nangzüksütsü ajungmesor ta pai ashi.

Nagaland loktiliba nung democracy tera yanga lir aser olemtep aser mulungtepa dang lemtettem agia arur. Iba democratic tangatetba ya sorkar ketdangsübaren aser public libaliro nung anepaluba benschitsüla ta Sinha-i ashi.

"Chichiba democracy nung nisung ajak ola lir aser ajak taginüba aser mulungba nung ajemdaker lemtettem agitsüla" ta paisa shisem.

National Voters' Day pledge ajanga sensotemi democracy dak tamang akaba aser linük nung

democratic inyaksangshi sülen anidaktsü nangzüker ta paisa metetdaksü.

Electors Photo Identity Cards (EPIC) anguba voter tasentem nem tenügsang agütsür aser nenoki elections agidang vote enoktsütsü ajungshir ta Sinha-i ashi.

"Na electoral roll nung tenüng zülüoka lira, vote enoktsütsüla. Nai yamaji inyak nung dang chichiba right to vote ta asübaji jangjatsür" ta pai ashi.

"National Voters' Day ajanga India nung democratic inyakyim indang tashi nenshir aser justice, liberty aser equality tangatetba nangzüksüshir" ta Chief Electoral Officer (CEO) Nagaland, Bhagyashree Banayat-ia ashi.

"Taküm atema omenji "My India, My Vote" lir aser iba ajanga democracy ya rejutem aser inyakyim atema dang masü saka sensotemi shilem agiba ajanga kümzüka ayur ta asüba osang agütsür. Kodang sensotemi meteta aser tebilemtsü bena vote enoktsüdir parnoki linük tejakleni aoba nung yariteper" ta lai ashi.

"Election Commission of India aser state tem nung election ketdangsürtemi bendanga agüja election tiptema, ochishia aser tashitsütsü melii agitsü atema meranga inyaker. Item maparen ajanga public-i democratic institutions dak temulung alemer"

ta Bhagyashree Banayat-isa metetdaksü.

CEO Banayat-isa lanurtem aser mezüng vote enoktsütsüopurtem dang linük tarutsü atema election nung shilem agitsü mepishia metetdaksü.

"Nenok ola, tangatetba aser mangdang ajanga tarutsü India yangerba nung yaritsü" ta lai ayongzüük.

Iba sentong nung Principal Secretary Sinha-i National Voters' Day pledge agidaktsü aser Best State-level Booth Level Officer (BLO) award o Best Campus Ambassador sempettem agütsü. Primary School tesayur aser Alongmen Ward-25 Mongoya Assembly Constituency Mokokchung Polling Station-5 nung BLO Sentitula nem BLO award aser Government College, Longleng nungi H. Longching Yingli nem Campus Ambassador agütsü.

Iba sentong nung Assistant Election Officer Chisho Swu menden liasü, Kohima Deputy Commissioner B. Henok Buchem-i tesentepertem pelaa agizük aser Joint Chief Electoral Officer R Mhathung-i anküp tepela o jembi.

Deobarnü Nagaland kübok district balala nung 16th National Voters' Day sentongtem ayongzüka agiogo.

NPF-i R-Day salem abener; Pastor merenshiba aitsür

Dimapur, January 25, 2026 (TYO): Naga People's Front (NPF)-i 77th Republic Day tenüng nung Naga nunger aser India senso ajak dangi tepela salem metetdaksüogo.

Onoki Naga nunger temetentem aser taginübatem atema inyakdang India'er democracy sülen anidaktsü nangzüker ta NPF-i ashi.

"India nung sobaliba senmang takar aser nisung temeyoktep alir aser onoki linük nung teputep aser azükaru atema külemi inyaktsüba nung amanger. Indian

Constitution nung democracy, equality, aser justice lateta aliba ya kanga tongtipang ta onoki agizüker" ta Press Bureau, NPF Central HQ: Kohima sangdong ka nung ashi.

Ajisüaka, tawa Odisha nung Pastor ka amakba atema onoki nemjema bilemer aser iba tatalokba ajanga India nung minority Christian nungeri reshikangshi ajuruba nenshir. India ya secular state ka lir aser iba amaji tamangba yimsü ajak agizüktsüla aser akhümtsübuttsüla saka ibala

tatalokba ajanga linük asoshi maaksü bentsür arur ta NPF-i metetdaksüogo.

Pastor ka dang tashiyim agi nashi scü chidaktsüba aser tamangba yimsü yimyim ayimdaktsüba khukhua aitsür. Ibala tatalokba ajanga nisung yirutsür aser India asoshi tenüng menük bentsür arur, ta parnokisa ashi.

Bangdakpurtemi temeten agütsütsü aser minority communities kümzüka ayutsü atema tangsa mapa inyaktsü ayongzüker ta NPF-isa ashi.

Nagaland Flatfenders Club-i otsü yanglu



Nagaland Flatfenders Club züngsemtem Original Stilwell Road nung aliba Hamilton Bridge nung tangokba noksa ya yangi angur. Iba apu ya 10th Regiment of Chinese Engineering Division ajanga yanglu, koba Chinese Burma aser India allied group nungi liasü.

Dimapur, Aenjeti/January 25 (TYO): Tang mezüngbuba Nagaland Flatfenders Club den 15 WW2 Era Willys and Ford Jeeps ajanga WW2 Jeeps Peace Rally anir Pangsau Pass International Festival (PPIF), Arunachal Pradesh nung January 19-22, 2026 anogotem shilem agia liasü.

90 buba PPIF WW2 Commemorative Peace Rally ya January 19, 2026 nü Hump WW2 Museum, Pasighat nungi tenzüka kilometer 182 tashiजार Namsai nung tembang.

Nagaland Flatfenders Club ya State Guests ama Arunachal

Pradesh sorkari Pangsau Pass International Festival (PPIF) 2026 nung shilem agitsü jaoka liasü, koba WW2 tembangba bilemteta küm 80 tashi mungyonga aruba sentong ka lir.

NFC ya T. John Longkumer, IPS (Retd.) President NFC, Pedi Miachieo Vice President NFC, Dr. Andrew Ahoto Sema Secy. General NFC, Alo John IPS Advisor NFC aser NFC nungi züngsem 18 den support team 12 dena liasü.

Parnoki WW3 Jeeps nung mener ajak agi kilometer 878 tashi awajema jaja. Iba mapang January 19 nü Pasighat nungi

Namsai (182 kms), January 20 nü Namsai nungi Lampong, Pangsau Festival Ground, January 21 nü Namsai nungi Jairampur War Museum, Lalpul WW2 Bridge, WW2 Hamilton Steel Bridge, The Stillwell Road aser Pangsau Pass Border Post sema jaja liasü.

January 22 nü Namsai nungi Pangsau Pass International Market Centre tashi oa Namsai-i meyipa arua rally tembang.

Iba mapang parnoki WW2 dak sendakba tongtipang tesemtem sema jaja aser sentong balala nung shilem agia liasü.

Creative Arts Immersion Tour atema TaFMA-i sentong ayongzüka lir



Theja Meru, Chairman, TaFMA aser Dr. Hovithal Sothu, Project Director, TaFMA den TaFMA District Partners züngsemtem January 24-26, 2026 anogotem Mumbai tashi Creative Arts Immersion Tour aodang tangokba noksa nung angur.

Dimapur, Aenjeti/January 25 (TYO): Task Force for Music & Arts (TaFMA), Government of Nagaland ajanga Mumbai tashi Creative Arts Immersion Tour ka January 24-26, 2026 tashi atema ayongzüka lir. Nagaland delegation nungya district ajanga nungi teshimtet nisungtem den TaFMA indang Chairman aser Project Director dena lir.

Capacity building aser exposure sentong ka ama yangluba immersion tour nukjiding ya district-level teshimtet nisungtem India nung creative, cultural & contemporary arts ecosystems indang tali tajungba nung metetdaksütsü asoshi lir. Iba ya ajanga TaFMA-i kentener, visual arts, live performance aser creative entrepreneurship anitetsü merangba nung tali tashi itdaksütsü.

Iba mapang parnoki Lollapalooza India ta sür alima nung kenten benjong tulutiba

rongnung ka ta züngshia aliba semdangtsü, kong Nagaland nungi Trance Effect ajanga shilem agitsü.

Iba ya ajanga parnoki tematiba jenjang nung kenten benjong ayongzüka ajangshitsü.

Parnoki iba tour mapang Mumbai nung Jehangir Art Gallery, Gateway of India aser museums den Marine Drive amala tongtipang aser tejanga tesemtem sema jajatsü.

Iba mapang Nagaland nungi aortemi India indang creative industries nungi nüngtugu artists aser practitioners tem den sensaksemtsü, koba ajanga shisa lemsatepa tangazükba balala alitsü.

Iba sentong ajanga district-level nungi tejanga nübu temi shisatsü angutsü aser item tangazükba bener arua Nagaland tesem balala nung amshia lokti terenlok nung yaritsü, ta TaFMA ketdangsur temi ashir.

TaFMA Chairman, Theja

Meru-i osangbener den jembidang, Nagaland Chief Minister, Dr. Neiphiu Rio dak mangdang tajung aliba aser tanen makai yariba asoshi pelaba lemsatep.

Air India Express ajanga delegation ajanga senzusempongba sponsor asüba atema Meru-i pelaba lemsatepa liasü.

Nagaland delegation ya Theja Meru, Chairman, TaFMA aser Dr. Hovithal Sothu, Project Director, TaFMA nati anir Mon nungi H. Samuel Konyak, Tseminyü nungi Hinenlo Kath, Tuensang nungi Hongsangsonla Chang, Kohima nungi Menguseu, Shamator nungi Toshi R, Peren nungi Namnahei, Noklak nungi Lengnio, Chümoukedima nungi Thepfuvikuo Secu, Meluri nungi Thsutho Kajirim Zunhebogo nungi Heli V. Zhimomi, Phek nungi Nuyi Hoshi, Wokha nungi Arhoni J. Jami aser Mhademo M. Ennio nungertem alitsü.

R-Day nüngtem nung Secretariat Plaza nung Exhibition & Sale ayongzüksü

Dimapur, Aenjeti/January 25 (TYO): 77 buba Republic Day anogomung nüngtem nung shilem ka ama Government of Nagaland indang department balalai January 26, 2026 nü Exhibition & Sale ayongzüka state nung local enterprises, artisans aser entrepreneurs sayutsü.

Sorkari sentong balala yanglua inyakba, indigenous products, public services aser local enterprises sayua entrepreneurship, sustainable livelihoods aser public awareness jenjang temabai ajungkettsü nukjiding nung iba exhibition ya ayongzüker.

Department of Industries & Commerce ajanga citronella aser lemongrass oils, leather oset, beadworks, teka agi yangluba juli tila tem densema sayutsü.

Under Developed Areas (DUDA) ajanga chiyongtsü aser alu nungi züsenteba aser teka mapa, jang tabu balala, jenjang-menjang, ninang mojitzi, teronem aketba süngo, traditional bags, jewellery, kaket aser candles amala osettem sayutsü.

Department of Animal Husbandry & Veterinary Services ajanga local entzü, mamatzü agi yangluba chiyongtsü, azümongshi aser quails takum, shiruru indang chiyongtsü amala indang exhibition-cum-sale ayongzüksü aser educational flyers lema agütsütsü.

Department of Agriculture stall nung alu nung amshiba machine oset, post-harvest machineries aser awareness agütsütsü. Iba nungya tzük, azüngken aser jenjang-menjang Nagaland nung züsenteba

sayutsü. Nüburtemi alu nungi züsenteba aonsotsü aser osettsüet balala alitetsü.

Nagaland Beekeeping and Honey Mission (NBHM) ajanga "Honey for Entrepreneur Development" omen kübok takum alitsü asoshi ninang metsüba indang sayua state tesem ajanga nung honey entrepreneurs jenjang ajungkettsütsü. Iba exhibition nung shilem ka ama NBHM ajanga Pradhan Mantri Janjatiya Vikas Mission (PMJVM) kübok Van Dhan Vikas Kendra (VDVK) I sentong nung Minor Forest Produces (MFPs) nungi adokdaksüba osettem sayutsü.

Iba exhibition nungya ninang tabu balala nungi agizükba ninang mojitzi tem, beeswax candles, lip balm, soothe balm amala sayutsü.

Nagaland Bamboo Development Agency (NBDA) ajanga eco-friendly bamboo products tem sayutsü. Yangji bamboo trays, platters, tongs, tooth brushes, pen/pen stands, bamboo wall decors, fridge magnets bamboo earrings & necklaces amala sayutsü.

Iba den külemi Nagaland Police, Department of Land Resources, Department of Co-operation, Department of Rural Development, Department of Tourism, Department of Horticulture, Department of Law & Justice, Department of Sericulture, Department of Urban Development, Department of Soil & Water Conservation, Department of Fisheries & Aquatic Resources, aser Nagaland Bamboo Development Agency nungia shilem agitsü.

Nagaland nungi Trance Effect-i Global Festival Lollapalooza nung shilem agi



Dimapur, Aenjeti/January 25 (TYO): Nagaland nungi Trance Effect ajanga otsü yanglua alima nung kenten benjong tulutiba rongnung ka ta züngshiba Lollapalooza nung shilem agia liasü, kong alima tesem balala nisung nisung 400,000 dak tema arua aden.

Iuli Yeptho, Tako Chang, Temsujungba Jamir, aser Sosang Longkumer nunger aliba kentener telok Trance Effect iba benjongmung tulu nung shilem agiba ya tongtipang alizüng ka alitsü aser Nagaland aser Northeast India

nung kentenba nung sempet tajung aliba nung alimai ranglokdaksür.

Lollapalooza nung Trance Effect yagi alimai kanga junga meteta aliba kentener Bloodywood, Calum Scott, Fujii Kaze, Yungblud, aser Linkin Park amala den shilem agia liasü.

Parnoki tatem nung "More Love" ken tenlokja terepranger tem temulung nung kongshia liasü. Aser parnok sapang nungi ainshiba sülena terepranger temi parnok ken tena liasü.



January 25, 2026 nü Kolkata nung tribal nisungtemi linük temzüng kümzüksü atema takhangba agüja longkak aitba noksa nung angur.

PM Modi-i sensotem dang democracy nung shilem agitsü ajungshi

New Delhi, Aenjeti/January 25 (Agencies): Amongnü National Voters' Day anogomong nung Ato kilonser Narendra Modi-i, vote agütsüba ya linük temzüng kübok maongka dang masü saka India nunger tarutsü tia yanglutsü atema senso shia nem teinyaktsü shilem ka agütsüba lir, ta metetdaksü.

Ato kilonserisa Election Commission of India (ECI)-i linük tesem ajaklen democratic inyakim tashi itshitsü atema inyakba asoshi tenüngsang agütsü.

Modi-i X ajanga, "#NationalVotersDay anogomong nung salem lemsateper. Iba anogo ya asen linük nung democratic inyakimtem nung tamang katetba anogo lir. Election Commission of India-i democratic inyakim tashi itshitsü atema inyakba asoshi tenüngsang agütsür. Vote agütsüba ya linük temzüng kübok maongka dang masü saka

tongtibat teinyaktsü ka lir, koba ajanga India nunger tarutsü tia yanglutsü atema senso shia nem ola agütsür. Democratic inyakim nung shilem agiba ajanga asenoki asen democracy tanela nem akhüm agütsüdi, ibaji ajanga Viksit Bharat tamendakdak tashi itshidaksütsü," ta metetdaksü.

Modi-isa MY Bharat volunteers den shidi ka lemsatepa tang mezüng vote agütsüsupurtem dang pelaba lemsatep. "India nunger democracy ya alima nung tulutiba lir aser "Democracy tetsü lir," ta pai ashi.

1951 küm General Election tenzüka sülen India-i küm 75 ajungba amonger, ta pai ashi.

"Voter ka asütsüji maongka tulutiba lir aser ibaji democracy nung teinyaktsü shilem lir. Vote agütsüba ya linük temzüng kübok temeshi temeden ka lir aser India tarutsü tia latetba nung shilem agiba temaitsü lir," ta pai metetdaksü.

Tang mezüng vote

agütsüsupurtem dang pai, tang electoral inyakim nung adenba ya tongtibat alizüng ka tongtetba lir, ta ashi.

Paisa lanur ka vote agütsütsü temsüa akümbe arrshi küm tongtetba atema kibongtem, lokti, schools aser colleges-i tenüngsang agütsütsüla, ta ashi.

Election ya democracy benjung ka lir, ta shia Modi-i Himalaya len aliba sensotem nungi tenzüka kanga tezülen aliba asetkong nungi sensotemi democracy inyakim nung shilem agitetba metetdaksü.

Ato kilonser Modi-i MY Bharat volunteers dang voter registration ajungkettsütsü aser vote agütsüba nung shilem agitsü ayongzü.

National Voters' Day ya küm shia January 25 nü amonger. Iba anogomong nung democracy akhüm tushir aser election nung shilem agitsü sensotem ajungshir.

Taküm Election Commission of India indang omenji "My India, My Vote," lir.

Iran anema renemba UN bang-züing ka anema India-i vote agütsü

New Delhi, January 25 (Agencies): Tawa Iran nung yimsüsürtemi longkak aiterem anema tashiyim amshiba atema Iran aija renemba UN Human Rights Council indang bangzüing ka anema India-i vote agütsü.

Iba bangzüing anema vote agütsürtem rongnung India, China, Pakistan aser tanga linük pezü lasiü.

Züingsem 47 aliba tenteti iba bangzüing renem, linük 25-i iba bangzüing pusema vote agütsü, linük 7-i iba bangzüing anema vote agütsü aser linük 14-i vote magütsü.

Linük ka tetshia renemba bangzüing pusema India-i vote magütsür aser tesüiba mapangtem nunga Iran nung meimchir temeden anema inyakba atema UN-i renemba bangzüing anema India-i vote agüja aruogo.

Tang tesüsa Iran anema renemba bangzüing anema India-i vote agütsüba atema

Iran ambassador to India, Mohammad Fathali-i India dang pelaba lemsatep.

"Yimtenren nung ajemdaker tim mesüi inyakba anema India-i vote agütsüba atema pelar. Iba ya ajanga India-i ochi temeden aser linük ka tashi pusema sayur," ta Iran ambassador to India-i X ajanga metetdaksü.

India-i linük ka telung inyakim nung mamoshitsü tangatetba nung ajemdaker tesüiba mapangtem nunga item ama UN bangzüing anema vote agüja aruogo.

2024 küm nunga Iran ketdangsertemi Jammu & Kashmir dak sendakba ken o nung jembiba o nung ajemdaker Iran anema renemba bangzüing anema India-i vote agüja lasiü.

India nunger telung inyakim nung Iran-i kecha mejembitsü, ta ashiba nung ajemdaker 2025 küm nunga UN nung Iran anema renemba bangzüing atema India-i vote magütsü.



Srinagar, January 25, 2026: Republic Day atongtsü anogo ka lia Amongnü Srinagar nung Jammu & Kashmir Special Operation Group (SOG) sepaitemi ki mita aodang tangokba noksa nung angur.

Indian Army JCO 2,241 nem honorary officer rank agütsü

New Delhi, January 25 (Agencies): Junior commissioned officers (JCOs) aikati mapang talangka junga tenzüka agi Republic Day jakdang Central sorkari parnok nem honorary commissioned ranks agütsüogo.

Indian Army nung JCO 2,241 nem ranks agütsü; JCO 437 nem honorary captain rank agütsü aser JCO 1,804 nem honorary lieutenant rank agütsü.

Honorary captain rank angurtem rongnung Subedar Major aser honorary Lieutenant rank angur Sanjay Kumar densema lir. Pa ya Param Vir Chakra award angur ka lir. 1999 küm Kargil War mapang nung tasü itta raraba atema pa nem

iba award agüja lasiü.

Kargil War mapang 1999 küm July 4 nü pa kanga mejungi yirur liaka pa kijai tsükchirtem indang machine-gun post aika maakdoka Flat Top, Point 4875 agiteta lasiü.

Indian army nung Honorary ranks ya mapang talangka junga tenzüker, unit level nung nendaka tenzüker aser tasü itta rarar JCOs nem agütsür.

Taküm honorary lieutenant aser honorary captain rank angurtem aika Subedars aser Subedar Majors lir. Parnoki lanur sepaitem nem training agütsür, regiment inyakim wazüka ayur aser tesem balala nung rarar.

Tamil Nadu nung Hindi atema tesem mali: M K Stalin

Chennai, January 25 (Agencies): Amongnü DMK Tir aser Tamil Nadu Chief Minister M K Stalin-i state nung Hindi oshi anema longkak aitdang asürtem nem akhüm agüja, iba state nung Hindi oshi atema tesem mali, ta metetdaksü.

Language Martyrs Day anogomong nung asürtem nem akhüm agüja pai, "Pei oshi meimba state kati pei taküm meimer, Hindi kangshia benokba anema longjemer

nokdaker; iba oshi kangshia benokba shia longkak aiter. 'Language Martyrs Day'; (Tamil Nadu nung) taoba mapang nunga, tang-a aser teti Hindi oshi atema tesem mali," ta metetdaksü.

Stalin-i, "Tamil Nadu leniba nung Hindi anema nokdakba ajanga sub-continent (India) nung oshi balala temeden aser maitsü wazüka ayur," ta metetdaksü.

"Tamil atema pei senti taküm tenla agütsürtem nem ni akhüm

agütsür. Oshi tongbang nung joko taküm kata mesamatsü; onoki Tamil meimbaji kodanga masütsü. Hindi kangshia benokbaji onoki teti anemtsü. #LanguageMartyrsDay #StopHindiImposition," ta paisa metetdaksü.

1964-65 küm Tamil Nadu tesem balala nung Hindi oshi anema longkak aitdang aikati peisasa mi agi rongseta asü. Tanü tashi Tamil Nadu-i oshi ana- Tamil aser English dang agizüker.



Manali, January 25, 2026: Rürjep tali alaba ajanga Manali nung gari sademsadema mesenzüteti anendena aliba noksa nung angur.

Malad railway station kima professor ka tsüngset

Mumbai, January 25 (Agencies): Honibar aonung Mumbai kübok Malad railway station nung mangatettep adokba sülen college professor, Alok Kumar Singh tsüngset.

Arrshi küm 33, Singh ya Vile Parle nungi Kandivali-i aoba mapang train nung passenger ka den mangatettep adoka lasiü, iba sülen kotari amshia pa tsüngset, ta Government Railway Police (GRP)-i metetdaksü.

Singh ya NM College nung teinyakdak lasiü. Train nung passenger ka den mangatettep adokba sülen train ji Malad station atongba mapang passenger ka jagi pa dak kotari agi aiben atsüng. Railway police-i pa anasa aliba hospital kati anir ao saka mekümzüktet.

Iba tatalokba dak sendakba nung Borivali GRP-i mejangjaba nisung ka anema ken o benokogo aser aibelensangji aputsü bushidar.



TIR YIMYIM YIMOBILEM (EDITRIAL)

DIMAPUR MONDAY, JANUARY (AENJETI) 26, 2026

Tamajunger adenshitak asü ?

Tang tashi nung Nagaland nung tangar yimti terabo mesüka kumteta alibaji Dimapur ya dang lir, ibayongji Dimapur nung ajaki linür aser aji oda Dimapur nung lia shishilembaba aser taküm nungdak nguteta inyaka otettsüsa mapa angudak lenmanga aika lir. Ibaji asenok asoshi tamoatsü aser takok ta züngshitsüba mapa ka lir. Iba tangatetba nung asenoki Dimapur ya ozüing shitak amshidak aser ochishir alidak tesem ka kuma litet nungbo, memetetika küm ishika tsüngda Northeast nung yimti tajung tulutem rongnung züngoktsüsa yimti tajung ka yanglutettsü. Atangji, tanüa Dimapur ya Guwhati den toktepa renloka ooya lila, saka küm ishika jakdang asenok yimten tebilemtsü mekottet yimten nüjiso bushir telok aika kümer kati ka taküm samatsütsü meranger aser tangar business inyakertema tetsübu agi tali majung akümba ajanga Dimapur tuluba aser tajungba kuma renloksü melen merenlokteti tamajungba dang akümba asenoki ajangshir. Iba ama yimti tulu aser tajung kümnüseta alidang, ano Dimapur, Chumukedima aser Niuland sünga Naga nunger yimten nüchiso bushirtem alitsü asoshi designated camps aser Ceasefire mapatem reprangba tesemtem lapoka aliba ajanga nübortem asoshi yimjung aser tesünep masü saka tang Thilixu (Teliko ta olasübo adoktsü) yimtak NSCN/GPRN (Khango-Vusshe) alidak atalokba amaji timtem aser shisabolutsü mapatem dang ataloker. Ibai Dimapur asoshi dang masü saka Nagaland ajunga asoshi kanga tia majung ka asütsü. Iba ama asenok rongnung asen tebilemtsü khureta makok alidang, ano Bihar state nungi dena ozüing raksartem arua Dimapur nung jenoka aliba tensa tiaji asenok asoshi kanga mejungi kümogo ta asenoki angatetdi. Aji oda, Dimapur ya Naga nunger ozüing raksartem asoshi dang masü saka India tesem balala nungi auer aser rakzükratemer aser ozüingi memelaba mapa inyakertem jenokdak aser amongdak amato ka dang asenoki kümdaktsüra, tamalen iba yimobilem nung lemsatepba amato, Dimapur ya yimtok kümadoktsü aser Dimapur anasa aliba Assam len dang arem agi asenoki ngua yimti kuma renloka aotsü. Asenok asoshi tebilemtsü kaji, asenoki Dimapur lima mejungi kuma aoba ya mereprangtetsüa akok, kechiyong asenok ajak ya anogo shi pei boksüing bushia senzürtem dang lir, anungji asenok meranga inyakertema aser meinyaki saru sarua jajartema pei boksüing ngura ojang ta bilemer aser pei boksüing bushidang asenok kati ka yirutsüteper. Ajisüaka, oagi Bihar state tashi nung oagi Dholbazza yimti nung shishilembartem dang Dimapur nung jenoka yur tashiyim agi sen meshiba puteta Bihar police-tem Dimapur tashi aruagi iba nisungbaji nguteta pua bener aobaji, Bihar police asoshibo takok osang ka saka asenok asoshibo shisabolutsüka lir. Iba amaji aiben Bihar nung Nagaland nungi temelaba kaket shitak melii bener aoba prangbongtem apuba osanga angashia aruogo aser Dimapur nung tesem tesem nung ozüingi memelaba shibelen mapatem inyakba indang asenoki angashir. Item ozüing anema inyakba mapatem aser inyakertemji Dimapur nung kenyongi mali kuma inyaktsübaji state government mapa asütsüla. Tang tangbo Dimapur ajanga dang ozüingi memelaba osettem aser achi-ajemtsütem belenshiba asenoki meteter, itemji Dimapur nungbo government-a mali ama sademsadema inyakba angur. Iba amaisa odaktsüra Dimapur ya ashir auer aser rakzükratemer tesep aser ozüingi memelaba mapatem inyakba tesem-ang ka kümadoktsü. Idangjibo, alimai Dimapur nung alirtem ajak tashiyim agi sen sarua kibong mesürtem ama bilemtsü aser ozüingi memelaba oset aser achi-ajemtsü ayokertem amai dang reprangtsü. Aji oda, Dimapur ta asüidang, teindang nisungtem alidak, tetsübu makai sademsadema shishilembaba mapa inyakdak, lanurtem mazüingi mapa inyaka amongdak aser tamanger tajung alidak yimti ta jet ta tangar mulungjangi arutsüsa asenoki asen yimti ya yanglutettsüla. Tangbo asenok ajaki mashimashi ka dang, kecha talenba aser tazüokba ozüing ka mali, ajak kanga mazüingi sen bushilen jajar, ajisüaka tang amaisa asenoki asen yimti ya tanüker aser tazüoker mali toktsüra, tanü asenoki aaba sen aseni magishitsü aser asüing asen kidang asen malitsüsa akümtsü. Tanü linük ajaklen linük temzüing ozüing indang jembia amongdang, asenoka asen lima aser yimti kümzüka yutettsüsa temzüing ozüing akangshitsü nungdaker.

OLEMSABANG

MERAJEMBA TEKUREM

~ L.Temjenwapang

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

Ken mapang ka Nokinketer yimti nüburtemji tashi tawa, tasütait aser tesangra liasü, parnoki shinga metsübur. Yamaji merena litepa mapang, asangur ka aso tajung, tepur tajung jembu shinüji tetangshi, wanshin metetba taküm ano inyak sangshia tashi, pa tenüing Wangshirenba, kibong tajung tsüraburji takar kika süchir. Par ya tanur ka dang anungji tsürabur jake jabaso-ji azü ajak roseba meim.

Künep yakta Wangshiba nok aia angu, anungji parnok chiyongba mapang Ojalai ashi, Tebu asen alu inyaktsüji yimertem taah anir inyaktsü, ano ki mapa asü nunga ojala lir tu, na kangabo tebelem. Aya-a oja, asen asoshibo alu mapa inyaktsüji tebilemtsü tulu kabu mali, saka asen dang teküboktiba tia nung alir aika lir anungji itemji yaritsü atema ni kanga jangrar. Obalai; Tebu nai ashibaji shidak asen sobaliba tajung benshitsü tiem, na tanü shir lu-i aotsü? Oba kü temba Rongjenba tsürabur mali tenu tena dang, anungji ni tanü par lu-i aotsü. Obalai; Nai tanü nü temba yarinüba amaji teti medemer kati ka yaritepa alitsü-ji kanga tongtipang, shir yaritsüla ta ajiteter itemburji aseni akokba tashi nübu rongsen shisatsü agi yaritsüla, ano teti temulung nung ayutsüba kaji, kechi tia, mesüra kechi jenjang nung lidir liaka ochi o ochi mapa kodanga tamadok. Wangshiba chiyongzüker hojong hu tazüing nungji teka ataloka yur tebui ashiba o-temji tenok-tenok-a anga ali. Oba, tanep kechisa shiogo kü mulung nung teti rizünga ayutsü. Obalai; Temulung nung rizüngbaji-a junger saka benshitsü-ji sa tongtibangba.

Joko Chiyongtemer Ojalai mejemtsü bener arutsübaji agizüka ajem aser ashi, aya nütsü ya oda alima tetsü rongnung tajungtilai yangluba mejemtsü asüba agi ne mulungjang mesük kanga nanga yanglutetogo. Testü-i langzü, aji oda alima nung shir mulungsentsü merüka junga ali par tiabai süla, ne nungdem nung

yangluba mejemtsüji ner tia agi ananger akoba, idangji Wangshibai par tsürabur kati ka den akümtsübuteba temeim o jembitepa ajakji anga alui aotsü renem. Obalai ashi, Tebu meranga inyakang saka menu meyanga teinyak, menur jajabaji lenmang nung arür nem sa menepdaktsür.

Rongjenba; Temba nai ni tanü yamai yaritsü mulungtetba ya ni kanga pelar.

Wangshiba; Nai pelaba amaji ni sa tepelaba kechiba süra ni na yaritsüsa mapang tajung ngutetbaji nia pela jangratemer.

Mapang kobi meli par lima Tsüngrem yimsü tajung aru, leptept tsüngtept anena aküm. Oli oratsü kechi-a tarendakstü mali, joko tekolak alepa anena aküm, sünep- sünepa yimjung nung tesem ka nungi ka aotsü kecha tetsübu mali sadok- sadoka Tsüngrem yimsü-ji par yimli ajak ayimsünga amangteper, tetsübuttsü kecha mali pelatepa litepa mapang ka. Yisu Khrista osang tajung agizük dang yimti nung tambutisang küm 104 Oboula Kümzüknemba, shisa taka taküm ka liasü, arishi anogo tonger Tsüngrem rah agi iba lima nungi pila ao, Tambuti asür asü nung yimer ajak sendener lepko munga ali dang ajungbena ola kanga tesashi aser kodanga mangashidangba ola ka angashi. Lepko mungur ajakji tsübutep, joko nisung ajakji olaji bushitsü tenzü, kari adem teko nung aser tsün, tsünpang ajak nungji bushiteper saka mangur yamaji lulutepa alidang, Wangshirenba ya jeretperet asangur ka asü nung pai alilenji aküm anüla ka angu, anungji pai yakta anünglenji repranga yok, shiruru tuluka yima aor amai angu, idangji pai ya kechi, shiruru ta ayimden. Lepko mungur ajak kechamati süngmanga achitep, tanem-tanemi olaji sama aküm. Joko par yimertu nisung shiai pei- pei reprangtetba nungi rata mata agi sünger tang shiruru mesük ka aoba otsüji kisüing jembitsü tenzü.

Joko aluruwa tsük ajak ki tongseper, tanübu ayong ka sepa armen sena chiyongi odi ta sür kenü Wangshiba tetsü aser tebu par asem ayong kati ao. Kidang nungi apuso dang par asem ya kanga meimteba alir asü nung Wangshibai Oja, khu ya ni benti (ta meshi). Khu ka nung par asem tanü chiyongtsü chitem inoka lir.

(Maneni asüing adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Bengal Christian Council-i 'peace rally' ayongzüka agi



January 20, 2026 nü Kolkata nung Khristantemi peace rally nung shilem agidang tangokba noksa nung angur. Bengal Christian Council-i ayongzüka sentong ya St Paul's Cathedral nung tenzük aser Mayo Road nung Mahatma Gandhi kürakyanglu aliba tesem nung tembanga liasü.

Kolkata, Aenjeti/January 25 (Agencies): India tesem balala nung Khristantem aser Tenla kitem amakba anema January 20, 2026 nü Kolkata nung peace rally ka ayongzüka agiogo, ta osang ka ajanga metetdaksü.

Bengal Christian Council-i ayongzüka sentong ya St Paul's Cathedral nung tenzük aser Mayo Road nung Mahatma Gandhi kürakyanglu aliba tesem nung tembanga liasü. Iba sentong nung Khristantem dang masü saka Hindu nungertem aser Muslim nungertema aikati shilem agi. Khristantem amakba ya yimsü ka anema inyakba dang masü saka meimchirtem anema inyakba lir, ta parnoki metetdaksü.

Iba sentong nung shilem agirtem rongnung ka, Pratt Memorial School nung tesayur, Lorraine Banerjee-i, "Iba tongbang ya yimsü ka amangertem atema dang masü saka ajak atema lir. Social media ajanga pei tebilemba lemsateptsübo kanga melamelar, ajisüaka nisungtemi lenman nung adenshia ola adoka ayimdentsüla. Onok ya nütsüng ajema alirtem lir aser nütsüng ajema alirtem amaker," ta ashi.

Iba rally ya Church of North India nung Moderator aser Bengal Christian Council nung Tir, Rev. Paritosh Canning leniba nung agi.

Rev. Canning-i, Khristantem kümzüksü atema Bengal Christian Council-i Ato kilonser Narendra Modi nem temepishiba shidi ka agütsütsü, ta metetdaksü.

Methodist Church of India Bengal region nung executive secretary, Rev. Kamalaksha Sardar-i, "Onoki kar anema yimyim ayimer masü saka temeim aser taremzüktep atema ayongzüker," ta metetdaksü.

Paisa, taoba ita Puri nung Right-wing teloktemi Khristmas benjung sübottsü ayokertem amokmerena liasü; item ama tatalokba kanga bulua akümer, ta ashi.

La Martiniere for Girls nung tesayur, Florence Pereira-i, "Khristantem nem tekümzüka agütsütsü nüngdaker. Linük tesem balala nung Khristantem amakba angudang onoki tsübua bilemer. Tang tesem kar nung yamaji atalokdar, saka kasaji

onok dak-a ataloktsüa akok. Onok ya yimjung meimertem lir. Onoki azütokshi mesüra rara maginer. Onoki tsübua bilemdang Kibuba dang sarasademer," ta ashi.

Iba sentong nung jembidang Hindu tsür Romi Majumdar-i, "Item ya Khristantem amakba dang masü saka meimchirtem anema inyakba lir. Iba ama tensa mapang ka nung asenoki longjemer ola adoktsüla. Ibayongji ni iba sentong nung adener," ta ashi.

Calcutta Diocesan St Saviour's School nung tesayur, Farheen Rafique-i, "Yimsü balala amangertem süaka asenok ajaki yimjung atema inyaktsüla," ta ashi.

Tamalen Rev. Canning-i, Bengal sorkar aser Centre sorkar naprongla dang Tenla kitem aser missionary temi lapokba rejutem kümzüksü atema inyakdaksüner, ta mepishia liasü.

"Asenoki noksa ana nguogo. December 25 nü Delhi Cathedral nung Ato kilonser sentong ka nung aden aser pai sarasadema liasü, iba sentong

nungji ni-a dena liasü. Onokia pa atema sarasademja liasü. Ano külenbo Tenla kitem amaker. Noksa ana ya medemdangra tejashitsüka lir," ta pai metetdakja liasü.

"Iba rally tembangba sülen anogo ana tsüngda onoki state Angh ajanga Ato kilonser nem temepishiba shidi ka agütsütsü. Pa dang nütsüng ajema alirtem kümzüksü atema inyakdaksüner ta mepishitsü," ta pai metetdakja liasü.

Paisa, "Tenla ki amakba aser Khristantem amakba tesemtem nung alirtem danga longjemer ola adoktsü atema onoki, Bengal Christian Council-i ajungshitsü. Bengal nung onok tesünep nung alir aser item ama timtem majangshir, ajisüaka tanga state nung asen adianutemibo timtem ajangshidar. Bengal Christian Council-i parnok nungittsü," ta ashi.

Rev. Canning-isa, state tesem balala nung Khristan school temi timtem balala ajangshidar, aser ibaji ajanga sensaker kaketshirtem tamajungba kongshir, ta ashi.

anema apusutsü aser yimli-i yimli anema apusotsü, aser tesem-tesem nung ayawara aser menoknok alitsü. Saka item ajakji tekangshitsü tetenzüker dang," ta ashi. (Mathi 24:7-8).

CBN indang "Faith in Culture" episode nung jembidang sayutsüngir, Nick Vujicic-i, "Asenok tatembang putu ka nung alir asü? Atangji au," ta ashi.

Israel linük ya 1948 küm nung ang tenteta liasü, aser Khristantem aikati iba ya tatembang anogotem dak sendakba shin o atalokba lir, ta

ANO GO ABEN TSÜNGREM DEN

Temenenji ozüng raksaba

Shibaisa temenen menar, pai ano ozüng raksar: aser temenenji ozüng raksaba lir.

1 Yohan 3:4

Tanelaren shidak meshidak tasadangba ka makai taküm alitsübaji lendong lir. Tsüngrem Oji tasadangbaji lir. Temang ozüng amaji tanela ozüngji na sottsüba masü, na kümzüksüba lir. Nai ne temeten amshia electricity den tokteptsü akok, saka yamaji inyak nung ne dangi tasüba bener arutsü. Yamaji nai Tsüngrem ozüngtemji meraksatsüla, item jagi ne taküm raksatsü. Tsüngremi jakla aser tanelaren ozüng yanglu saka asenoki asen timtem yanglur. Sobalibai Tsüngrem ozüngtem malemer. Tensa tia itemji majenbanger Tsüngrem ozüngji tatem makai alir aser item jagi na tasü nungi kümzüksü nai anidakra.

Tsüngremer ozüngtemi na satema mesüdaksüi sotetter aser alener ta nai bilemtsü akok. Yamaji masü. Tsüngremer Oi na tasü nungi kümzüker (Rom 6:23). Tatishitsü agi, kodang Tsüngremi ne dang nüktapangta tesü ta ashir, Pai na satiba tesendaktep nung jangratema tepela ajunga agidaksüner. Iba dang tali nai item ozüngtem raksara nübutsü/ ne kinüngbo, tanurtem, ne kinungertem aser ner kibong arogo dangi tekolak menütsü arutsü ta Pai metet. Ne taküm asoshi Tsüngrem ozüngtem koda tongtipang! Itemji makara Tsüngremi na asoshi tepela rizünga yua alibaji nai mangutsü. Ne taküm amendaksü Satani Tsüngrem ozüngtemji masü tanga jenjang ka shimer. Nai ne kiyonger, mesüra lokti ajanga ne taküm asadangra, nai ozüng raksaba nung ne taküm amendaker aser ozüng raksabaji temenen lir.

Asenok ya atangji tatembang putu ka nung alir: Nick Vujicic



January 25, 2026: Tang Israel, Iran, Greenland aser Venezuela ama linüktem nung tatalokbatem ya asadangra atangji asenok ya tatembang putu ka nung lidar ta ni bilemer, ta sayutsüngir Nick Vujicic-i metetdaksü.

Mathi tapu 24 nung Yisu Khristai Pa nütsüngtem dang tatembang putu mapang temaitsütemindang metetdakja lir.

Yisu nütsüngtemi Pa dang, Kibuba tanaben marudang tamangertemi kechisa ajangshitsü?, ta asüngdangba langzüdang Yisu-i, "Kini kin

anema apusutsü aser yimli-i yimli anema apusotsü, aser tesem-tesem nung ayawara aser menoknok alitsü. Saka item ajakji tekangshitsü tetenzüker dang," ta ashi. (Mathi 24:7-8).

CBN indang "Faith in Culture" episode nung jembidang sayutsüngir, Nick Vujicic-i, "Asenok tatembang putu ka nung alir asü? Atangji au," ta ashi.

Israel linük ya 1948 küm nung ang tenteta liasü, aser Khristantem aikati iba ya tatembang anogotem dak sendakba shin o atalokba lir, ta

amanger.

"Ajisüaka asenoki angatettsü kaji, Yisu Khrista tanga arutsü ama asenoki alitsüla aser renema alitsüla," ta pai ashi.

"Molumiji tetsübutsüka lir aser Yisu tepor ajungji khenyongi balaka, ibayongji ni melungsentsü ajak agi Pa dak amanger aser pei teshisadangba nung melung malemer (Apijemtsü Shin 3:5-6)," ta pai ashi.

Tatembang putu ka atema o entepba mapang nung US tesem ajaklen tanela asentenshi milak jangrudar, talisa yaküm conservative activist Charlie Kirk khasetba sülen US tesem aika nung tanela asentenshi milak jangrudar, ta pai ashi.

Vujicic-i, nisung aikati 'revival' atangji tetezü memetet, ta ashi.

"Iba [revival] ya temenen nangzüka temelung meyipba lir, kodang nisung kati Kibuba den nokdakdir Kibubai ki merüktettsür aser iba nisungba menen merüktettsür. US-i temenen nangzüksü aser

temenen nungi pilatsü nüngdaker," ta pai ashi.

"Asen linük tentetba sülen küm 250 ajungtsü, asenoki temenen nangzüka temelung memeyipra asen linük ya tesempatsüka asütsü. Asenoki temenen nungi meyiptsüla, aser ni iba atemaji sarasademer," ta pai ashi.

Tawa Barna Group data ajanga ashiba agi, 2025 küm Laishiba azüngba shilem 42 aküm aser ibaji 2024 küm den medemdangra shilem 12 agi teimba akümba lir.

Iba dak alia 2025 küm Generation Z lanurtem shilem 50-ibo parnoki hopta shia Laishiba azünger ta shiogo, aser ibaji 2024 küm den medemdangra shilem 20 agi teimba akümba lir.

Tang America nunger tsüngda telemsa adoka aliba dak sendakba nung Vujicic-i, "Asenoki Kibuba den asen jenjang koma aliar metettsü nüngdak, ta nisung aikati meteta arudar. Nisung aikati ochi atema tzürar aser aikati 'atangji ni Lashiba nüngdaker' ta bilemer," ta ashi.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Tutep

(v) ang mesüra süng agi oset ana metentep, ajem agi sü ana ka kuma arütep. (pin together, skewer together)

* Tanübo mapa inyakdang tula tejen ka mashimashi tutepa arür asem.

Tutera

(n) süngolio tapu aika (leaves of several kinds)

* Kütsüi ngashi nung tutera aon kanga junga asor.

OLONG PAITEP # 7395

	1		2			3		4		5
6								7		
					8		9			
			10							
11										
				12						
13		14		15					16	
17							18			

TIPIEN

1. Inyaker ajangtetba

-(3)

3. Bangsemo adokdak

-(5)

6. Shitak mesüi inyak

-(7)

7. Ya mimong nung angur

-(3)

9. Reprangzük

-(4)

10. Tasola

-(5)

11. S _ _ _ _

-(4)

13. Yagi ajak ashioktsür

-(3)

15. Ki aokba oset

-(7)

17. Ak shi nung inokba tasen

-(5)

18. Ishika

-(3)

LANGTSÜNGLEN

1. Meshidak

-(3)

2. Tanaben soshir

-(7)

3. Iba anogo

-(4)

4. Meshi

-(3)

5. Yagi mi tsükloker

-(9)

6. Shi tapu ka

-(9)

8. Yagi ayimer saka ozü masü

-(3)

9. Ajokba shiruru ka

-(7)

12. Inyaktet

-(4)

14. _ _ _ hi

-(3)

16. Akümüli nungi pilar

-(3)

OLONG PAITEP # 7394 TELANGZÜBA**TIPIEN :**

1. Telok, 4. Aluru, 6. Ozüing, 8. Emk,

9. Kin, 10. Teti, 12. Süir, 13. Jen,

14. Ola, 16. Talak, 17. Mazük.

LANGTSÜNGLEN :

1. Tenükjang, 2. Luden, 3. Kiochtsü,

5. Lenti, 7. Tajangzük, 11. teronem,

12. Sempa, 13. Jahaz.

NAI-A YA METETTER

Haryana nungi Rohtash Khileri-i Mount Elbrus nung oxygen teyari magii ghonda 24 litetba indang otsü tasen ka yangluogo. Mount Elbrus ya Europe nung tenemkolak talangtiba lir aser 5,642 metres (above sea level) ajungketa lir.

Tripura Agar industry atema GI tag bushir: Jyotiraditya Scindia

Agartala, January 25, 2026

(Agencies): Centre-i Tripura agar atema Geographical Indication (GI) tag angutsü kanga merangdar ta Union Minister for Development of North Eastern Region (DoNER) Jyotiraditya Scindia-i metetdaksü.

Tripura nung agarwood industry ajanga Rs 2,000 crore shi angutsü lenmang sadema lir ta pai ashi.

North Tripura district kübok Agarwood Cluster Processing Centre ka yanglutsü lung azünga yutsüdang Union Minister Scindia-i iba osang metetdaksü.

Iba mapatong ya Prime Minister's Development Initiative for North East Region (PM-DevINE) scheme kübok inyaksü.

"Agar tsünürtemi tiyongtsü nung inyakterem medeni international markets den

sendakteptsü atema sorkari CITES aser tanga mandatory permissions digitalized asütsü inyakdar. Iba ajanga aluyimertemi jenjang tajung agi ayoktsü aser agar industry maparen tashi aitsü" ta Scindia-isa ashi.

Agar products atema export quota trokben agi teimba kümogo. Agar chip exports 25,000 kg nungi 1.5 lakh kg kümogo aser agar oil exports 1,500 kg nungi 7,500 kg kümogo ta paisa metetdaksü.

Assam kübok Golaghat district aser North Tripura nung central agar processing centres ana yangludat, ta Scindia-isa shisem.

Centre-i agar value chain tashi itdaksütsü atema inyaker. Iba maparen kübok North Tripura district nung Rs 80 crore jenjang agar-based project ka inyaksü ta paisa ashi.

Union Minister Scindia-isa

Tripura nung roads, solar power plants aser health infrastructure mapatongtem atema lung azüngtsü aser kar sayatsü.

Prime Minister Narendra Modi lenisüba kübok aser Tripura sorkar teyari ajanga Assam aser Tripura nung agar industry ajungkettsü mapa balala inyaker. Prime Minister'er 'Vocal for Local' aser 'One District, One Product' alizüing den iba ya kanga puteper, kechiyong North Tripura nung Fulbari area nung agar kanga junga tsünüteter, ta Scindia-isa metetdaksü.

"India nung agar süngdong 15,000 crore shi lir ta asadangteta alibaji 99% North East aser Tripura nung lir. Tripura nung agar industry den global markets sendakteptsü atema buyer-seller meets ayonga agir aser tawa Qatar nungi shishilembartem den-a ajurutepogo" ta paisa ashi.

Gauhati High Court-i IAS officer Talo Potom aputsü tuyur

Guwahati, January 25, 2026

(Agencies): Gauhati High Court nung Itanagar Bench-i IAS officer Talo Potom indang bail meyipa agiogo aser pa aputsü tetuyuba agütsüogo.

Yaküm November ita trial court-i kuli tongti aser ozüingren junga masadangi Potom nem bail agütsü. Iba lemtet ya tim masü aser junga meshisadang ta High Court nung Justice Yarenjungla Longkumer-i ashi.

October 2025 nung Lekhi village nung Gomchu Yekar sosetba dak sendakba nung iba ken o ya lir. Yekar tebu Tagom Yekar-i High Court dang bail temelaba agientsü atema ken o benoka liasü.

Iba ken o nung tai tonglokja alisangi par jabaso timtemdaksü, tashiyim agi shi nung medem aser ochimashi inyak ta Tagom-i ken o benokba nung shia lir.

Potom pur anogo tenetnü nung bail temelaba agütsü saka iba mapang bushisüngdang tetenzüklen ang liasü ta Tagom atema okatsüri High Court nung ashi.

WhatsApp chats aser voice messages delete asübatem forensic analysis südar ta okatsürisa ashi.

Suicide notes zülubaji tasüdang handwriting lir aser law & order tebilemtsütem ajanga custodial interrogation mesütet ta Special Investigation Team

(SIT)-ia jangjatsüogo.

Lower court-i bail mapang "mini trial" ka agiba aser kuli kecha melii tasüsang indang mental health dak tai tongloktsübaji tim masü ta High Court-i oshidang agütsüogo.

"Iba tatalokba ajanga loktiliba aoksadaksü aser sentsü alir ka dena lir. Pa kanga kara bail nung chiokba ajanga bushisüngdang nung meinprong ajurutsü akok" ta High Court-isa ashi.

Iba nung ajemdaker High Court-i November 2025 bail tetuyuba agienogo saka Potom-i tim dang süra trial court nung fresh bail meshitsü temelaba agütsüogo.

Assam nung Khanikar Stadium multi-sports arena tulutiba

Dibrugarh, January 25, 2026

(Agencies): Dibrugarh nung Khanikar Stadium ya Assam nung multi-sports arena tulutiba asütsü aser iba ajanga Assam nung sports infrastructure ulushiba sayur.

Union Home Minister Amit Shah-i January 30, 2026 nü Khanikar Stadium mezüngbuba shilem tembangba lapoktsütsü sentong lir.

Honibarnü Assam state BJP general secretary aser Assam Tourism Development Corporation chairman Rituparna Baruah-i stadium semdanga reprangdangogo.

Iba stadium ya ali 104 bighas nung Rs 233 crore endoka yanglur aser modern, world-

class sporting complex ka akümtsü nükjidong lir. Mezüngbuba shilem renemogo aser iba nung seating capacity 5,000 spectators shi asemstsü. Maneni, shilem balala lemsar nisung 35,000 tashi mentettsüsa stadium yanglutsü.

2019 nungi upgradation maparen tenzüka liasü aser iba nung athletics, football, swimming aser other disciplines den indoor stadium, hostel accommodation, VIP block aser main gallery alitsü.

Honibarnü Dibrugarh District Sports Association president Niranjan Saikia, senior association officials, aser Public Works Department, Executive

Engineer den engineers aser officers dena stadium reprangdangogo.

Iba mapatong ya taoba Chief Minister Sarbananda Sonowal alidang tenzüka liasü aser July 5, 2018 nü lung azüing.

Chief Minister Himanta Biswa Sarma-i ashiba agi mezüngbuba shilem ya Rs 210 crore shi endoka yangluogo aser ano shilem balala lemsar inyaka aotsü.

"January 30 nü Phase I multidisciplinary sports complex lapoktsü. Iba stadium ya ali 105 bighas nug yanglu aser iba nung Village Grazing Reserve (VGR) land ta züingsema aliba 55 bighas dena lir" ta Rituparna Baruah-i ashi.

Indonesia anetsüh lendong nung asür 10 jungogo; nisung 80 samar bushidar



Jakarta, Aenjeti/January 25 (Agencies): Indonesia nung anetsüh tulu ka aluba sülen samar alir nisung 80 maneni bushidar. Mission coordinator-i ashiba agi, tsüngsang kanga majungba ajanga aonung inyakyim anena atatsüsa aküm. West Java province nung Honibar anepdang züngia anentsü tulu ka aluba nung asür nisung 10 jungogo. Deobarnü ano tasümgang asem nguteta liasü, ta state meyong media sangdong ka ajanga metetdaksü.

Tzünglu kanga sashia aruba sülen West Java kübok West

Bandung nung yimtsüngtem Honibar anepdang anentsü agi kongshi. Annetsüh yagi yimtsüng anenbang aser iba ajanga nüburtem pei talidak ki toksür aotsüsa kümogo.

Kasa mapang nung tzünglu kanga aruba ajanga aonung inyakyim anena atatsüsa aküm, ta mission coordinator Ade Dian Permana-i Deobarnü mapa metenzük tsüngda ashi.

Maneni Indonesia yimtiba Jakarta densema West Java nung tesem aika tzü agi metsüngba osang ajanga metetdaksüogo.

Military, police aser

volunteer temi teyari agüja tekümüzkertemi anentsü agi anenbanger aliba tesem machine mashi merektetdar.

Parnokisa, lendong agi kongshir alirtem bushitsü atema drone aser canine unit tem yokogo, ta national rescue agency-i metetdaksü.

West Java nung October nungi March ita tashi tzünglurowa mapang tzümet süng aser anentsüh agi aiben kongshia timtemer.

Iba ita Siau asetkong nung tzünglu kanga sashia aruba sülen tzümet süng lendong nung nisung 16 süogo.

US-i amaktsü tetsübo nung Iran lenir Ali Khamenei miima ayur

Tehran, Aenjeti/January 25 (Agencies): United States-i amaktsü akok ta mitkar tanishir aser security ketdangsür temi tekum dangtsü ashiba sülen Iran indang Supreme Leader Ali Khamenei ya 'special underground shelter' kati anir ogo ta osang ajanga ashir.

Security tensa asadangba mapang bendanglen nungi timtem agütsütsü akok ta asadangtetba sülen iba mera ya agi ta Iran sorkar den kanga junga metettepa aliba source ana nungi Iran International dang ashi.

Iran nung kanga sashia longkak aitba sülen Tehran aser Washington tsüngta tensa tamajungba kumer aliba mapang ka nung linük nung tematiba lenir tesem balakai belener aoba osang ya angazüker.

Longkak aitba sülen tang tashi Iran timtema liaka United States nungi Iranian migrants tem meyipa yoktsü Trump administration-i sentong yangluba mapang ka nung iba ya ataloker.

Iranian-American non-governmental organization ajanga ashiba agi, item deportation flights ya Iran tesem ajunga nung yimden yimsüsür anema nokdakba sülen Iran-i aoba tayimtsü mezümpur asütsü. Longkak aitba ya January ita tesashiba akum aser iba sülen security forces temi tashiyim amshia azüok.

Iran ketdangsür temi longkak aiter pua merenshiba maparen tesashi inyak ta human rights groups temi ashir. Nisung meyirijang aika asüba lokti tentet balala osang bendena lir aser Norway nung aliba telok Iran Human Rights-ia nisung 25,000 dak tema tepsetogo ta ashir.

Iran sorkaribo nisung 3,117 asü ta ashir aser yangji "martyrs" nisung 2,427 lir ta ashir. Ketdangsür temi security forces aser civilian züngsem bendangtsü asoshi yamaji ashir aser civilian tem dang bendangeri ajungmesoba rongrong-shirong adokdaksür ta ajar.



Programme for Celebration of 77TH REPUBLIC DAY 2026

ON 26TH JANUARY, 2026 AT NAGALAND CIVIL SECRETARIAT PLAZA, KOHIMA

0600 hrs : Unfurling of National Flag in all Government Offices, Institutions/Public & Private Buildings.

0850 hrs : Review of Parade by DGP, Nagaland.

0900 hrs : Hon'ble Chief Minister arrives, unfurls the National Flag, receives Rashtriya Salute and inspects the Parade.

Address by the Hon'ble Chief Minister.

Presentation of Awards.

March Past.

Parade Contingents:

- 13 Assam Rifles Bn.
- 78 Bn. CRPF
- 105 Bn. BSF
- Tripura Police
- DEF Kohima
- 4th NAP Bn.
- 10th NAP (IR) Bn.
- 15th NAP (IR) Mahila Bn.
- Home Guards & Civil Defence & SDRF
- Ex-Servicemen
- NCC (Boys)
- NCC (Girls)
- Bharat Scouts & Guides
- 13 Assam Rifles Pipe Band
- Nagaland Police PTS Brass Band
- 15th NAP(IR) Mahila Bn. Pipe Band
- Nagaland Police Auxiliary Brass Band

Parade Commander : Shri Z. Tshurhosie Kajiri, NPS
Dy. Commandant, 5th NAP Bn.

Second-in-Command : Ms. Gurpreet Kaur, IPS (Probationer)

SPECIAL PRESENTATION

- Song (Vande Mataram) : TaFMA
- Drill Display : Women Resource Development

CULTURAL PRESENTATION

- Jakhama Village Cultural Troupe (Angami)
- Yachummaro Cultural Troupe (Lotha)
- Pochury Cultural Troupe Kohima (Pochury)
- Yimkhiung Beru Cultural Troupe (Yimkhiung)
- Yangphi Jümülile Mülöng (Sangtam)

INAUGURATION/LAUNCH BY THE HON'BLE CHIEF MINISTER

- Inauguration of the EXHIBITION STALLS
- Launch of MARCOFED E-Commerce Platform 'NagaBazaar'
- Inauguration of Drone School-Drone Centre of Excellence, Nagaland at GIS & Remote Sensing Centre

Distribution of sweets at parade ground by Indian Red Cross Kohima district branch

Visit of Institutions by Charitable Organizations

- State Mental Health Institute : Gorkha Public Panchayat, Kohima
- Bright Morning Star Orphanage : Nagaland Contractors & Suppliers Union
- Kohima Orphanage & Destitute Home : Hindu Kalyan Samiti, Kohima
- District Jail : Kohima Masjid Committee
- Cherry Blossom : Kohima Chamber of Commerce & Industry
- Old Age Home : Royal Club, Kohima
- District TB & Chest Diseases Hospital, Khuzama : Puliebadze Club, Kohima
- Mt. Gilead Home : Classic Club, Kohima
- Cradle Ridge : Rotary Club, Kohima

EVENING PROGRAMME AT NAGALAND CIVIL SECRETARIAT PLAZA

- 1430 hrs :** Football Exhibition Match
Kohima District Football Association Vs Morning Premier League
- 1600 hrs :** Prize Distribution
- 1615 hrs :** Band Display

- 13 Assam Rifles Pipe Band
- Nagaland Police PTS Brass Band
- Nagaland Police Auxiliary Brass Band

Beating of Retreat

ALL ARE WELCOME TO ATTEND THE PROGRAMME.

It will also be Livestreamed at the official DIPR Nagaland Youtube Channel.

Australian Open: Sabalenka, Alcaraz & Gauff quarterfinals-i iogo



Aryna Sabalenka

Carlos Alcaraz

Coco Gauff

Aenjeti/January 25, 2026 (Agencies): Deobarnü Australian Open round of 16 asaya nung Aryna Sabalenka, Carlos Alcaraz aser Coco Gauff nung er ajaki pei tata asaya koka quarterfinals tongtetogo.

Third-seeded Coco Gauff-i Deobarnü Margaret Court Arena nung asaya nung Czech tsür Karolina Muchova 6-1, 3-6, 6-3 agi koka liasü.

Tetsür kija asaya nung Sabalenka-i Canada tsür arishi küm 19 tain Victoria Mboko 6-1, 7-6(1) agi kokogo.

Sabalenka quarters nung ano arishi küm 18 America tsür Iva Jovic den asayatsü, shibai Kazakh tsür Yulia Putintseva 6-0, 6-1 agi ayong ayonga kokogo. Laisa anogo ana tejakdang

seventh-seeded Jasmine Paolini tsükdakja liasü.

1998 küm Venus Williams sülen Jovic ya Australian Open nung set ka nung danga tamakok mongui quarterfinal atongba tetsür asayartem rongnung tanutsütila kümogo.

Tebur kija asaya nung Top-seeded Alcaraz-i kanga toktepa asayar 19th-seeded Paul 7-6(6), 6-4, 7-5 agi koka quarterfinal tongtetogo.

Maneni tebur kija asaya nung taoba küm runner-up Alexander Zverev-i maneni kanga junga asaya Francisco Cerundolo 6-2, 6-4, 6-4 kokogo. Pa Grand Slam ka akoktsü atema meranga asayaba mapang ka lir. Pa taruba asaya United States nung er asayar

Learner Tien den asayatsü.

Deobarnü Learner Tien-i Russia nung er asayar tejen Daniil Medvedev straight sets nung koka pa Andy Roddick sülen America nung er rongnungi tebur kija asaya Grand Slam ka quarterfinals tonga asayaba asayar tanobusang kümogo.

Arishi küm 20 tain Tien-i Margaret Court Arena nung iba asaya ya 6-4, 6-0, 6-3 agi ayong ayonga koka liasü.

Tebur kija asaya nungsa Grand Slam 24 koker alisang Novak Djokovic-a Australian Open tebur kija asaya quarterfinals-i iogo. Round pezübuba nung pa den asayatsü alisang Jakub Mensik yiruba ajanga masayatetsüsa akümba sülen pa quarter-i iogo.

T20 World Cup 2026 atema Pakistan squad sangdongogo

Aenjeti/January 25, 2026 (Agencies): India aser Sri Lanka na nung asayatsü aliba ICC Men's T20 World Cup 2026 atema Pakistan-i asayar 15 agi kümteba squad ka sangdongogo.

2009 champion team ya Salman Agha lenisüba nung asayatsü aser taküma iba asayamung akoktsü atema meranga asayatsü imlar. Iba asayamung ya February 7 nü nungi tenzüksü.

Tebur T20 Internationals asaya nung tawa-ang run timtiba yangluba asayar akümba sülen Babar Azam-a team nung züngoksemogo, aser pa tajangshiba ajanga Pakistan team nem teyari tulu agütsütsü.

Maneni Shaheen Shah Afridi-a team nung züngoksemogo, aser Haris Rauf maliba mapang Afridi aser Naseem Shah nati fast bowler tem anir asayatsü.

Team nung all-rounder Faheem Ashraf, Shadab Khan aser Mohammad Nawaz nungera züngoksema lir, aser parnok adenba ajanga team batting aser bowling naprongla nung liromedema kümdaytsütsü.

Kasa mapang nung wickets

ya spinner tem atema tapet asütsü ta angateta Pakistan-i squad nung spinner Mohammad Nawaz, Khan, Abrar Ahmed aser Usman Tariq nung er züngoksemogo.

Iba asayamung nung Pakistan team Group A nung co-hosts aser defending champions India, Netherlands, USA aser Namibia nung er den ata lir.

Parnok mezüngbuba asaya February 7 nü Netherlands den Colombo nung asayatsü.

Pakistan squad:

Salman Ali Agha (captain), Abrar Ahmed, Babar Azam, Faheem Ashraf, Fakhar Zaman, Khawaja Mohammad Nafay (wk), Mohammad Nawaz, Mohammad Salman Mirza, Naseem Shah, Sahibzada Farhan (wk), Saim Ayub, Shaheen Shah Afridi, Shadab Khan, Usman Khan, Usman Tariq.

Pakistan's T20 World Cup group fixtures:

- * vs Netherlands: February 7, Colombo
- * vs USA: February 10, Colombo
- * vs India: February 15, Colombo
- * vs Namibia: February 18, Colombo.

Onokibo asayanüa liasü saka sorkari memela: BCB

Aenjeti/January 25, 2026 (Agencies): Bangladesh Cricket Board (BCB)-i Deobarnü ashiba agi, India nung Men's T20 World Cup 2026 asayatsü asoshi parnokibo mulunga liasü, saka Bangladesh sorkari parnok nem temelaba magütsü.

BCB director Abdur Razzak-i ashiba agi, World Cup densema linük aden or asayatsü atema sorkar temelaba kechi südir süaka agütsü nüngdaker. RTV den sensaksemba mapang pai, iba asayamung nung shilem agütsü atema board renema aliba aiben lemsatepogo, saka ketdangsürtem tetuyuba sülen anidaktsüsa akümer, ta ashi.

BCB Media Committee mendenbuba Amzad Hussain-i ashiba agi, Bangladesh team asayamung nungi aginogo aser board-i ken o tali mashishi-i ICC-i telemteba agiba agizükogo.

Paisa, BCB-i ICC dang Bangladesh team indang asaya ya Sri Lanka-i belener aotsü mepeshi aser tatembangbuba telemteba magi tsüngda aiben sensaksemogo, ta ashi.

"Onoki ICC dang onok indang asaya Sri Lanka-i belener aotsü mepeshi. Onok aiben sensaksemogo. Parnok representative tem aru aser sorkar ketdangsürtema

densema liasü. Iba sülen Zoom senden ka amen aser ICC board-i onok dang onok indang asayatem belener maotsü telemteba agiba aser tang yanglua aliba fixture ama dang India nung asayatsüsa akümtsü ta ashi. Ajisüaka anogo ka lir sorkari cabinet senden ka ayongzüka amen. Iba senden nung telemteba ka agi, aser fixture memelenshira onok team India nung iba asayamung nung shilem magitetsü ta ashi. Iba osang ya sorkari agüja liasü," ta pai ashi.

Amzad Hussain-i ashiba agi, ICC-i parnok dang ghonda 24 tsüngda telangzüba agütsütsü tetuyuba agütsü.

Bangladesh-i iba asayamung nung masayatsü telemteba agiba sülen parnok melena Scotland asayatsü. Iba osang ya ICC-i Honibarnü sangdonga liasü. Asayamung ya February 7 nü tenzüksü aser India o Sri Lanka na nung asayatsü.

Amzad Hussain-i ashiba agi, security dak sendakba nung tetsüdaktsü lir ta shia sorkari team India-i maotsü asoshi tenokdangba agüja liasü.

BCCI-i Kolkata Knight Riders dang Bangladesh pacer Mustafizur Rahman 2026 season nung masayadaktsütsü ashiba sülen linük ana mangatettep tenzüka liasü.

Perth Scorchers-i BBL title benogo

Aenjeti/January 25, 2026 (Agencies): Perth Scorchers-i Deobarnü Perth Stadium nung Big Bash League final nung Sydney Sixers akokba sülen iba asayamung trokbenbuba kokogo. Parnoki iba asaya wicket trok agi koka liasü.

Asaya nung mezüng batting amenba sülen Sydney Sixers puri over 20 nung run 132 dang yanglua liasü. Scorchers pur atema paceer David Payne aser Jhye Richardson na senteper wicket trok agi.

Run arishiba mapang Scorchers puri ball 15 anunga lia asayar 4 out sür run 133 yanglua iba asaya akok. Parnok rongnungi Mitch Marsh-i ball 43 nung run 44 yanglua team takok dangi ania liasü.

"Onok tapubang nungi khuret tulu ka pongtok ama bilemer. Onok timla tulu liasü aser takok nguteba ya jangrademtsüka lir," ta Scorchers captain Ashton Turner-i ashi.

Scorchers team innings ya Australia indang T20 captain, Marsh-i six ka züka tenzü. Pa indang opening partner Finn Allen, shibai season nung run (466) timba yanglua liasü paia run 36 yanglu, saka pa Starc-i ball aonba mapang Jack Edwards-i catch out sütsü.

Seamer Sean Abbott-i Aaron



Hardie (run 5) aser Marsh na out sütsü, saka Josh Inglis-i (29 not out) long-off leni six ka züktoka par team takok dangi ania liasü.

Sixers' pur batting amenba mapang Steve Smith (run 24) all-rounder Hardie-i out sütsüba sülen Perth stadium nung nisung 55,018 adenshia alirtem pelatepa liasü.

Iba sülen captain Moises

Henriques-a run 24 dang yanglur Payne-i out sütsü, shibai iba asaya nung run 18 agütsür wicket 3 agia liasü. Henriques ya ball pongu tsüngda run out asütsü aliba asemben tashi jenboa liasü.

Kasa mapang nung Fast bowler Mahli Beardman-i final asaya nung wicket ana agi aser tatembangbuba over nunga asayar ka run out süja liasü.

BILEMDANGANG

"Taginüba matalokdang Tsüngrem temaotsü züngdangtsü tamatok."